



2018-mut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)

(Aappassaaneerera)

Inimi isersimasut qiviarukkit kiinnat assigiinngitsorpassuit aamma inuit assigiinngitsorpassuit takussavakka. Tamatta immiklut isumaqarpugut isummersortarlutalu aamma oqallinnerpassuit pitsaasut maani inimi ingerlattarpagut. Ilaat isumaqatigiissutigisarpagut allallu isumaqatigiinngissutigisarlutigit aammami suut tamarmik isumaqatigiissutigisarutsigit demokratip siunertaa isumaalu isumaqarnaviangilaq. Qujanarpoq tamatta assigiinngitsunik isumaqaratta naleqartitaqarlutalu.

Kisianni aat, oqaatigissavara ilaannikkut tupigusuallaatigisarpara pissutsit piviusut (Fakta) isumaqatigiinngissutigisaratsigit. Uanga isumaga naapertorlugu piviusoq (fakta) assortuussutigineqarsinnaangilaq. Assortuussutigerusunnilarput aamma assortuussutigissanngilarput 2+2 fiiaraanersoq - piviusuuvoq tamatta akuerisariaqagarput. Piviusut pillugit asuleertoqarsinnaangilaq.

Aamma ilumoorpoq (fakta) ukiut tamarluinnaasa milliartinik arlalinnik danskit naalagaaffianit tapiissutisisaratta. Aamma ilumoorpoq (fakta) danskit naalagaaffiata immikkoortut arlallit akilersormatigit isumagisaralugillu assersuutigalugu inatsisunik atortitsineq, pisagut tassaapput oqartussaaffiit 32-t.

Taamaakkaluartorli takusinnaavara suli inoqartoq - inuiaqatigiit akornanniinnaangitsaq aammali maani inimi allanilu - isumaqartunik piviusorsioruusoq massakkorpiaq naalagaaffinngorsinnaanerput. Naalakkersuisoqatigiinni aamma inissisimasoqarpoq taama isumaqartunik.

Taakkorpiat aamma Naalakkersuisut nersualaarpat akisussaassuseqartumik aningaasaqarnermut politikkeqarnerarlugit aammalu aningaasanut inatsit pitsaasoq naammassineqalernerarlugu. Aap eqqartugara unaavoq aningaasanut inatsit ullumikkut suliarisarput. Aningaasanut inatsisissaq 8 millioner koruuninik amingartooruteqarpoq piffissami massakkorpiaq, aali ingerlalluarfitsinni.

Qanoruna ilillusi innuttaasut oqarfigisinnaasarpisigit piviusorsioruusoq piffissami qaninnermi naalagaaffinngornissarput, aningaasanut inatsimilluunniit sinneqartooruteqartumik



takutitsinnaanasi piffissami ingerlalluarfiusumi? Isumaqatigiinniarnerni oqaatigereerpara aamma uteqqissinnaavara, ataqatigiinnngilluinnnaqqissaartoqarpoq uagut siutitsinni, isitsinnilu.

Piffissami qaninnermi naalagaaffinngussagutta taava manna aningaasanut inatsisissaq amingartooruteqassagalarpoq minnerpaamik 5 milliarder koruuninik. Uagut isummatsinni torinngeqaaq innuttaasut illuatungaani oqaluukkaangassigit naalagaaffinngornissarput uaneralaanngumiittoq aappaatigullu aningaasanut inatsisissamik sinneqartoorutilimmik sanasinnaanasi piffissami ingerlalluarluinnarfitsinni. Innuttaasut torersumik akissuteqarfigisariaqarpasi qanoq ilillusi isumaqarsinnaallusi piareeqqasugut naalagaaffinngornissatsinnut aappaatigulli akisussaassusilimmik aningaasanut politikkimik takutitsinnaanasi, qularnaarlugu imminut napatittumik aningaasarsiulernissamut toqqavissaq isumannaatsoq - allatut oqaatigalugu aningaasaqarneq, minnerpaamik danskit naalagaaffianneersumik bloktilskudimik isumalluuteqanngitsoq. Ilaatigut aningaasatigut danskinit isumalluuteqarunnaarutta, susasaqarfiit 32-it nammeneq kivissinnaanngorutsigit namminiilivissinnaavugut. Oqartoqassaarmiaasiit, aningaasat namminiilivinnissamut kisimik isumalluutissaanngillat, nalunngilluinnnaqqissaarparput, kisianni namminiilivissagutta aningaasat pisariaqarluinnnaqqissaarput, nunarput imminut napatissappat isumalluuteqarani.

Periarfissaqarsimaqaasi. Maannakkut naalakkersuisoqatigiisusut ukioq ataasinngortorsionertik nalliusseqqammerpaat, pilluakutsooritsi. Allatut oqaatigalugu ukiumi iluittumi periarfissaqarnikuuvusi aningaasarsionermut politikkissassi piareersarnissaanut.

Aningaasanut Inatsisissatut siunnersuutersi aggustimi saqqummiussarsi tanngassimaarutissaanngilaq, immaqami ilissi tanngassimaarutigisinnaavarsi, Demokraatiniit naamik. Aammalu siunnersuutip Inatsisartuni siullermeerneqarnissaanut saqqummiunnera hurraartuutissaanngilaq. Ammaanersionermut oqalugiaammut oqaatsikka eqqaamassajunnarsivasi minnerunngitsumillu Aningaasanut Inatsisissap Siullermeerneqarnerani, eqqaasipallassinnaavassi imatummi oqarama:

- Siuariartorneq 7 procentit missaanniittoq, torrak!
- Suliffissaaleqisut ikiliartorput, nuanneq!
- Aatsaat taama amerlatigisut qaffasissumik ilinniarput, kusanaq!
- Aalisarnermik suliallit aningaasarsiorluarput, ajunnginnerusinnaanngilaq!

Aammali oqarpunga massakkoqqissaaq pisut tatigineqarsinnaanngitsut - siumut qiviartoqartariaqarmat. Taannaqalumi...



Siullermeerinerup aappassaaneerinerullu akornanni pisut ajoraluartumik ersarilluinnartumik takutippaat maannakkut Naalakkersuisuusut partiillu tunuliaqutaasut politikikkut pingaarnersuisinnaanngilluinnartut, aammalu eqqortunik aalajangiisinnaannginneq eqqarsaatigilluakkanillu aalajangiisinnaannginneq inuiaqatigiinnut tamanut akisoorujussuanngoriaannaavoq. Oqaatsit qulaani allaqqasut uteqqilaarsigit, amerlanerusunik sinneqartoortariaqaraluarput, aningaasarsiornikkummi inissisimanerput pitsaanerunngisaannarnikuvoq.

Pisortat aningaasarsiornerat asuleerutissaanngilaq. Eqqarsarluannngikkaanni akueriuminaatsumik inerneaariaannaavoq. Taamaattuminguna pisariaqartoq sapiissuseqarnissaq naaggaarsinnaanissarlu. Piginnaaneq taanna aamma qunusuissuseq ajoraluartumik Naalakkersuisuniinngilaq.

Ilaannikkut eqqarsartarpunga aningaasanut inatsit mamakujuerniarfiusoq. Immaqa assersuussineq torrappallaanngikkaluarpoq, kisianni aningaasanut inatsit ussernartoqaqaaq, soorlu mamakujuerniarfimmi, suut tamarmik pilerinartarput suullu tamarmik perusunnarput. Kisianni mamakujuerniarfiup nioqqutissiaataasa tamakkernissaannut akissaqanngilagut. Toqqaasariaqarpugut. Pingaarnersuisariaqarpugut. Aamma taamaappoq Aningaasanut Inatsit eqqarsaatigalugu. Isumaqartoqarpog pisortat aningaasaataat upperisamut aaliangersimasumut atorneqassasut. Allat taama eqqarsanngillat. Inuit ilaat isumaqarput ICC aningaasanik amerlanerusunik tunisariaqartoq. Allat aningaasat atorusunneruaat takornariaqarnerup siuarsarnissaanut. Aamma ilaat isumaqarput akissarsiaqqortunernut immikkut akileraarusiinissaq tunissutaasoq naliitsoq. Allalli isumaqarput inuit ilinniarnissaminnut piffissamik atuisimasut pillartariaqanngitsut. Aamma allarpassuit oqaatigisinnaagaluarpakka. Assigiinngilagut, qujanartumik.

Kisianni piumanngikkaluaruttaluunniit toqqaasariaqarpugut pingaarnersuiillutalu tamatumunngalu Naalakkersuisut pikkorinnerpaajusimanngillat.

Puigornagu, Aningaasanut inatsisissamut siunnersuut sinneqartooruteqartussatut saqqummiunneqarnikummat. Taakkuli sinneqartoorutit maanna aappassaaneerinermi amingartoorutinngoriataarsimapput. Qanormita isikkoqassaaqaa pingajussaaniilerutsigit? Naalakkersuisut ilikkarsinnaanerlugu sapaatip akunnerata iluani naaggaarsinnaaneq? Taamaanngippat amingartoorutit amerleqqissapput tamatumalu assorsuaq ernummatippaanga. Eqqaasitsissutigeqqissavaralu massakkorpiaq Kalaallit Nunaanni ingerlalluaratta, aningaasarsiorneq siuariarpoq 7 %-nik - suliffissaaleqisut ikileriarput - aatsaat taama amerlatigisut ilinniarput - aalisarnermik inuussutissarsiutillit aningaasarsiorluarput. Taamaakkaluartorli Naalakkersuisut ataqatigiisitsisinnaanngillat, tupinnaqaaq eqqarsarnarlunilu. Ulluni ajornerni, aningaasatigut ingerlalluannngiffitsinni, ilaa qanormita ingerlasoqassava?

Oqaatigissavara unneqqarillunga, Demokraatit Naalakkersuisut naalakkersuisoqatigiillu partiivi



immitsinnut ungasittupilussuugatta maannakuugallartoq. Ersarissumik allanngortitsisariaqarpusi pingaarnersiullusilu 2018-mut Aningaasanut Inatsissatut siunnersuut sapinngisamik amerlanerpaanik taperserreqassappat - tamanna tassa pissaaq sapaatip akunnerata ataatsip ingerlanerani, Qularivara tusaaneqarlunga, kisianni neriukkaluassaanga.

Naalackersuisuni isumaqatigiinniarnernut kingullernut atatillugu Demokraatini saqqummiuppagut minnerpaatut piumasaqaatit. Akissarsiaqqortunerit immikkut akileraartinneqartalernissaat kissaatiginngilarput, ingerlatseqatigiiffiit akileraarutaat appaqqarput, iluarsartuussinerit isertitaqaataalersussat sukkannerusumik pinissaat piumasaraarput, paasinartuussinerit akeqqarput akit assigiikkunnaarsinneqarnissaat qanoq aningaasalersorniarneqarnersoq, isumaqatigiissusiorusuppugut perorsaasut atugaat pitsanngorsarusullugit, aningaasanut inatsit sinneqartooruteqassasoq piumasaraarput, pisorat ingerlatsiviini pitsanngorsaasoqassasoq piumasaraarput, timmisartunut suluusalinnut mittarfiliortiterniarnertit killiffii tusarusuppagut, aningaasarsiornermut pillugu pingaarnermik pilersaarusiortoqarnissaa piumasaraarput takujumallugu qanoq iliorluta aningaasarsiornikkut namminiilivinnissaq angussaneripput, Visit Greenlandip amerlanerusunik aningaasaliiffigineqarnissaa piumasaraarput ICC-mut taarsiullugu aamma oqarpugut pisortat ingerlatsiviini misissuinerit nalunaarusiornerillu atornerqarneqanngisaannartut amerlavallaartut. Aningaasaqarnermut Naalackersuisup oqaaserisaa paatsuugassaangilaq; isumaqarpoq piumasatta ilarpasui aningaasanut inatsimmut tungassuteqanngitsut...

Taava soorunami isumaqatigiinniarnertit imaannaangillat, uagutsinnullu ilungersunarnerulerlutik. Immaqa aamma aningaasanut inatsimmut isummagut assigiinngippallaaqaat. Pineqarpata oqaasertaliunneqartunut oqaaseqaatit, kisitsisit, kontut aningaasanut inatsimmiittut taava soorunami aningaasanut inatsimmut ilaapput, allaqussinnaangilaq, qanorluunniit aningaasanut inatsimmiinneraangitsigiluaaraanni.

Marloriarluta isumaqatigiinniarpuq sapaatip akunnerani kingullermi ataasiarluta aggersarneqarpugut kingulliit pisut pillugit ilisimatitsiniarmata. Naalackersuisut aaqqissuusseqqinnermut pilersaarutaannut Aningaasaqarnermut Naalackersuisumit ataasiarlutaluunniit aggersarneqarnikuunngilagut, taannami uanga isummanni aaqqissuusseqqinnermut ataqatigiissaarisuuvoq - maanngalu oqaluttarfimmuq qaqqinikka tamaasa oqarfigineqartarpunga " ilimmiuku aallartitatit aamma pilersaarusiarnikuusatit".

Suu ilaana nalunngilara, kisianni uanga tassaniikkunnaarnikuuvunga - aamma pisut ajorluartumik sunniuteqarfigiuminaapput uagutsinnut. Uagut istsinni arriippallamik sulisoqarpoq aammalu pingaarnersiuisoqanngilaq. Aamma nalulluinnarparput aaqqissuusseqqinnerit qanoq inerneqarumaarnersut aammalu eqqoriaruminaapput oqaloqatigiissutigineqarneq ajormata.



Aaqqissuusseqqinnerit massakkorpiaq saqqummiunneqartut iluamik aaqqiinerunngillat, isertitaassutaasinnaanginnamik. Aaqqissuusseqqinnerit akuersissutigissagaanni pitsaasut ajortullu ilaasariaqarput, inuiaqatigiinnut qujanarniarthoqaannarsinnaangilaq. Aaqqissuusseqqinnerit suli pisariaqarput. Demokraatinut pingaaruteqarpoq aaqqissuusseqqinnerit ingerlaqqinnissaat. Nuanniitsunik aalajangiinissarput qunugissanngilarput - aamma arlaannut annernassagaluarpataluunniit. Qunugaanni taava pissaanermik tigummissariaqanngilaq. Allatut oqaatigisariaqanngilaq.

Ingerlatseqatigiiffinnut akileraarutip appartinnissaa Demokraatit kisiartaalluta sorsuutigaarput. Appaanerup aallartitassai sunniutissaalu Naalakkersuisut takusinnaarpasinnngiivvippat, tamannalu inuussutissarsiortunut assut uggornarpoq. Nunatsinni ingerlatseqatigiiffiit akileraarutaat ima qaffasitsigaaq allaat nunami maani suliffimmik aallartitsinissaq ajornaasalluni - eqqarsaatigilaariartigu sorpassuit annaanerlutigit. Unammillersinnaassuseqanngilagut. Ingerlatseqatigiiffiit akileraarutaat appasinnerusuuppat taava qularinnngilluinnarparput nunami maani suliffiit amerlanerusimassagaluartut. Ingerlatseqatigiiffiit akileraarutaat appartinneqartuuppat aamma akileraartarnikkut iluanaarniapiluttarneq pinngitsoortinneqassagaluarpoq. Naatsorsuutigisariaqarpormi suliffiit sinneqartoortuminnik Danmarkimut, nunanulluunniit aallanut inissiisartut, taamaaliorunik minnerusumik ingerlatseqatigiiffiit akileraarutaannut akiliisassagamik. Ila aningaasammitta qassit inuiaqatigiit uagut tassuuna annaasarpagut?

Aamma uagutsinnut tupinnaqaaq, Naalakkersuisut isumaqarmata pisortat ingerlatsiviini pisariillisaasoqarsinnaangitsoq. Ingerlatseqatigiiffiit ilaat sulisuminik 20 %-nik ikililerisinnaappat taava soorunami aamma Namminersorlutik Oqartussani kommuninilu ikililerisoqarsinnaavoq. Aamma ernummatigineqassanngilaq inuit suliffissaarunnissaat. Suleqqilerumaarput sulisartut nunaqavissut pilerigineqartupilussuummata.

Maani inimi politikerit aalajangiiffisassanik siunnersuuteqartartut taamatullu Aningaasanut Inatsisissamat piumasaaqartartut suli amerlavallaaqaat. Siunnersuutit piumasaaqatillu ilisarnaatigaat nunatta aningaasaqarneranik kukkusumut aallartitsisaramik. Demokraatini neriuppugut Aningaasaqarnermut Akileraartarnermullu Naalakkersuisoq ima nukittutigissasoq allaat itigartitsisinnaalluni. Allatut ajornarluinnartumik sakkortuumik pingaarnersiuisariaqarpugut maannakkut aningaasarsiornikkut inissisimanerput pissutigalugu. Pinnguarnissamat aningaasassaqaanngilagut. Akiliunneqarluni angalasarnissamat siunnersuutertik (feriefrirejser) Naalakkersuisoqatigiit qujanartumik tunuartippaat maannalu taamaallaat amingaataalerpoq partiinut tapiissutit qaffannissaannut siunnersuutip tunuartinissaa, tamannami pissutaalluni landskarsi 3 millioner koruuninik amerlanerusunik amingaartoorteqartussaavoq tamannalu akissaqartinngilluinnarparput.

Ukioq manna ingasalluinnartumik aningaasarsiornikkut siuariartoqarpoq. Annilaanganalaanngitsuunngilaq piffissaq manna atorneqanngimmat piffissaq ungasinnerusoq



isigalugu eqqarsarnissamut. Aningaasat tamarmik imaaliallannerinnakkut atorpeqarput. Pingaarnersiusoqanngilaq. Sapiissuteqartoqanngilaq, piumasseqartoqanngilaq.

Taavalu naggataatigut sakkortuumik erseqqissaassutigissavara, ukiuni sisamani pisortat aningaasaqarnerata oqimaaqatigiinnissaanut missingersuusiornermut inatsisip piunasaqaataa matumani inatsisissatut siunnersuummi malinneqarsimanngimmat.

Naalakkersuisut qinnuigissavagut iluarseeqqullugit. Iluqutaanngilarmi Naalakkersuisoqassagutta Inatsisartut akuereriigaannut inatsisinut malinnikkumanngitsumik.

Taamatut oqaaseqarluta siunnersuut Aningaasaqarnermut Akileraartarnermullu Ataatsimiititaliamut suliareqqitassanngorlugu innersuupparput.